

Espainiako Gobernua aztertzen ari da FISeko buruzagi baten asilo eskaera

Errefuxiatu gehienei ez bezala, Melillako Gobernu ordezkariak ez dio trabarik jarri

Espainiako Gobernuak joko bikoitza egiten du integrismo musulmanari aurre egiteko orduan. Oso gogor salatzen ditu integristen ekintzak, baina bere etxean azaltzen diren islamistei tratatu samurra ematen die. Schengengo Itunaren aginduak ere alde batera uzteko prest dago islamaren gero eta eragin handiagoari aurre egin behar zaionean. Horren adibide argia da 1994ko urriaren 11tik Melillan bizi den familia aljeriar baten kasua.

ENRIQUE DELGADO / MELILLA

Bere burua FISeko (Aljeriako Fronte Islamista) burutzat jotzen duen Abukrar Kelkulek duela urtebete eskatu zuen Melillan babes politikoa beretzat, Hakima amaztearentzat eta adin txikiko semearentzat. Espainiari asiloa eskatu aurretik, alemaniarrei eskatu zien, baina hauek; espero zen bezala, ukatu egin zioten. Gertaera horrek nahikoa beharko luke izah Kelkul eta bere familia Espainian ez onartzeko, Schengengo Itunaren ondorioz, herrialde kide batek errefuxiatu bati babesa ukatzen badio, besteek berdin egin behar dutelako.

Konpromezu hori zela-eta Poliziako Zuzendaritza Nagusiak kanporatu egingo zutela jakinarazi zion FISeko buruari. Poliziako Zuzendaritzak argudiatu zuen ere Kelkulek eta bere senideek ez zutela legezko bizi-biderik eta Espainian legez kanpo zeudela.

Administrazioaren lehen ukatze horrek agerian utzi zuen prozedura bikoitza izan dela Kelkulen auzian. Poliziak emandako ezezko biribilaren ondoren, Manuel Cespedes Melillako Gobernu ordezkariak ez zion traba handirik jarri Kelkuli Afrikako iparraldeko hiri horretan bizitzeko. Inork ez dakien ibilbidea jarraitu ondoren, Kelkul eta bere familia Melillan bisarik gabe sartu ziren eta bertan urtebete daramate. Egoera hau ezohikoa da, joan den otsailean, Felipe Gonzalezen adiskide den Cespedesek berak bisarik gabeko bi bulgariar kanporatu egin baitzituen.



Legez kanpoko etorkin gehienek ez dituzte Kelkul FISeko buruaren erraztasunak izan.

EFE

BATZORDE ISLAMDARRA TARTEAN Poliziako Zuzendaritzaren erabakiaren aurrean, Cespedesek Kelkul eta bere familia kanporatzea beste irtenbiderik ez zuen, baina Batzorde Islamdarraren agerraldiak eragotzi egin zuen. Batzorde Islamdarra integrismo musulmanaren berpizkundearekin batera sortu zen Melillan eta islam erlijioaren jarraitzaile sutsuenak biltzen ditu. Batzorde honek FISeko burua ez botatzeko eskatu zion Cespedesi, eta honek, legeak onartzen dion eskubidearekin, kanporatzea atzeratu zuen. Zortzi hilabetez, Kelkul babes

egoera ezkutuan izan da, Batzorde Islamdarrak babestua.

Baina Melillako komunikabideek Kelkulen egoera ilegalaren berri izan zuten maiatzean eta Cespedes bi fronteren artean harapatu zuten: irregularitatea agerian geratu zen baina islamdarrek presio isila eta eraginkorra egiten zuten. Lehen aldiz Melillako historian, musulman integristak joan den ekaineko udal hauteskundeetara aurkeztu ziren Melillaren Aldeko Koalizioaren izenarekin. Cespedesek ezin zuen integristak bera Kelkul, amaztea eta haurraren egoera legezatzeko tramiteei ekin zion.

ASILOA AMAZTEARI EMAN DIOTE

Babes gutxien dutenekin neurri zorrotzak hartzeko betarik galtzen ez duen Administrazioa oso zuhurra da interes ezkutua defenditzen diutenean. Kelkulen kasuan, egoerari buelta eman zion, eta amaztea bihurtu zuen Aljeriako erregimen politikoaren biktima.

FISeko burua bigarren planoan geratu zen.

Kelkuli babes politikoa ematea ezinezkoa zenez, Aljeriako Gobernuak Hakima mehatxatzen duela erakusten duten agiriak agertu dira. Honen ondorioz, Kelkul, amaztea eta semea Cordoban bizi dira uztailaz geroztik Gurutze Gorriaren etxebizitza batean. Gobernuak Hakimen asilo eskaeraren tramitea onartu du eta Espainian sei hilabetez egoetako baimena dute senar-amazteek. Baimena Cespedesek berak eman die, nahiko era ezkutuan.

Melillan etorkinen alde jarduten duten elkarteak zur eta lur geratu dira aljeriar hauei eman zaien tratua ikustean. Gogorazten dutenez, estatu totalitarioetatik edo gerra ankerretatik ihesi datozen hainbat errefuxiatu afrikarrekin guztiz kontrako jarrera izan du Gobernuak. Eki Europako pobreziatik alde egin nahi duten herritarrek ere antzeko harrera jasotzen dute talde hauen ustez.

Juan Guerraren aurkako seigarren eta azken epaiketa hasiko da bihar

SEVILLA

Juan Guerraren aurkako seigarren eta azken epaiketa hasiko da bihar Sevillako Entzutegi Probintzialean. Alfonso Guerra lehendakariordearen anaiari Hazienda Publikoaren aurka bost delitu egin izana leporatzen diote, horietatik hiru errenta aitortpena ez egiteagatik, eta beste biak Corral de la Parra enpresako administratzaile zela elkarrean gaineko zerga ez ordaintzeagatik.

Juan Guerraren auzia deritzana duela sei urte azaldu zen Barbate herri txikian (Cadiz), udal bilera batean Serafin Nuñez bertako alkate sozialistak negozio turistiko baten etorkizun ona aipatu zuenean «Juan Guerra atzetik» zegoela argudiatuz.

Oraingoan 15 urteko espetxe zigorra eskatzen du fiskalak Juan Guerrarentzat, bere aurka inoiz eskatutako zigorrik handiena. Hala ere, azkenean fiskalak 12 urteko zigorra besterik ezingo du eskatu; legea aldatu denez, Haziendari egindako iruzurrak 15 milioi baino gehiagokoa izan behar baitu delitutzat jotzeko. Horri esker, Haziendari ez ordaintzeagatik zituen hiru salaketetatik bitan aske geratuko da lehendakariorde izandakoaren anaia. Fiskalak 200 milioi pezetako isuna eskatzen du Juan Guerrarentzat.

Orain arte izan dituen bost epaiketatik hirutan errugabetzat jo dute Juan Guerra. 'Fracosur' izenekoan, orube batzuen erosketan legez kanpoko bitartekari izateaz akusatzen zuten; 'Litomed auzian', berriz, osasun sistema publikoko gaixo batzuk eritetxe pribatu batera eramateaz; eta azkenik, 'Comasa' izenekoan, leporatzen zioten Expo-92aren atarian lur zati baten salerosketan tratutan aritzea.

Andaluziako Gobernu Ordezkaritzan ez zegokion bulego bat izateagatik —bertatik egiten zituen bere negozioak eta jendearen aldeko bitartekaritza lanak— urte eta erdiko espetxe zigorra jaso zuen. 'Fridex auzian', sei urterako inhabilitazio zigorra jaso zuen Alcalá de Guadaira lur zati batzuen kalifikazioa aldatzeko amarruak egin zituelako.

UNIVERSIDAD DEL PAIS VASCO



EUSKAL HERRIKO UNIBERTSITATEA

EIBARKO INDUSTRI INGENIARITZA TEKNIKOKO U.E.

95/96 ikasturtearen hasiera

2., 3. eta 4. mailak: urriaren 2an.

1. maila: urriaren 8an

Eibarren, 1995eko irailaren 29an